

**Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatsereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamut sulisuminnillu amerlisaanissamut aaqqissuussaannikkut aammalu inatsisitigut aporfissat suunerannik kingusinnerpaamik UKA2019-imi Naalakkersuisut saqqummiussinissaat pillugu Inatsisartunut aalajangiiffigisassatut siunnersuut. Aporfittut suussusersineqartut qanoq ililluni piujunnaartinnissaannut sapinngisamilluunniit aporfiit annikinnerpaamiitinnissaannut siunnersuummik nassuiaat imaqaassaaq.**

Inatsisartunut ilaasortaq Aqqaluaq B. Egede, Inuit Ataqtigiit

**pillugu**

**Inuussutissarsiornermut Aatsitassanullu Ataatsimiititaliap**

**siunnersuutip aappassaaneerneqarneranut**

## **ISUMALIUTISSIISSUTAA**

Inuussutissarsiornermut Aatsitassanullu Ataatsimiititaliap suliarinninnermini ilaasortarai:  
Inatsisartunut ilaasortaq Jens Danielsen, Siumut, Siulittaasoq  
Inatsisartunut ilaasortaq Múte B. Egede, Inuit Ataqtigiit, Siulittaasup tullia  
Inatsisartunut ilaasortaq Mala Høy Kuko, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Randi V. Evaldsen, Demokraatit  
Inatsisartunut ilaasortaq Tillie Martinussen, Suleqatigiissitsisut  
Inatsisartunut ilaasortaq Peter Olsen, Inuit Ataqtigiit

### **1. Siunnersuutip imarisai siunertaalu**

Annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamut sulisuminnillu amerlisaanissamut aaqqissuussaannikkut aammalu inatsisitigut aporfissat suunerannik qulaajaasumik nassuiaammik suliaqartoqarnissaa siunnersuuteqartumit kissaatigineqarpoq.

## **2. Ataatsimiititaliap siunnersuummik suliarinninnera**

Ataatsimiititaliap maluginiarpaa siunnersuut Inatsisartuni siullermeerinninnermi partiinit arlaqartunit taperserpeqartoq. Naalakkersuisuttaaq ujaqqat pinnerasaasiassat pillugit nassuiaasiornissaq pillugu siunnersuut tapersernartippaat. Naalakkersuisup akissuteqaammini ilaatigut oqaatigaa inatsit ullumikkut atuuttoq malillugu siunnersorneqarnikkut ilitsersuunneqarnikkullu annikitsumik aatsitassarsiornikkut ingerlatsinermik ineriartortitsinissamut periarfissat amerlasut. Naalakkersuisulli naliliinerat malillugu periarfissiisutaareersunik ilisimasaqarneq amigaataasorinarpoq.

Ataatsimiititaliap naliliinera malillugu ukiuni kingullerni aatsitassanut inatsimmik naleqqussaasarsimaneq annikitsumik aatsitassarsiornermik ingerlatsisut pisariaqartitaat ajornartorsiutaallu pillugit eqaannerusumik iliuuseqarfiginnissinnaalernermik nassataqarsimapput. Ataatsimiititaliap maluginiarpaa ukiuni kingullerni ujaqqanut pinnerasaasiassanut tunngatillugu ilisimasani katersaqartoqarsimasoq, tassani aamma ujaqqat pinnerasaasiassat Kalaallit Nunaanneersuunerannik uppernarsaasiisoqarsinnaanerani nassuiaasiortoqarsimalluni. Naalakkersuisut aamma siunnersuummik siullermeerinninnermi ilisimasani katersuineranut tassunga innersuussipput. Naalakkersuisut 2017-imi ujaqqanik pinnerasaasiassanik uppernarsaasiisarneq pillugu nassuiaasiorsimasut ataatsimiititaliamit ilisimaneqarpoq.

Uppernarsaasiisarneq pillugu nassuiaammik ilaatigut ujaqqanik pinnerasaasiassanik nunatsinneersunik tuniniaanermi ataatsimut aallaavimmik pilersitsinissaq siunertaasimavoq. Aammattaaq ujaqqanik pinnerasaasiassanik pisisut ujaraatimi assigineqanngitsutut assassorluni suliaaneranut kiisalu ujaqqat pineqartut Kalaallit Nunaanni katersaanerannik suliarineqarnerannillu uppernarsaaserneqarnissaannik periarfissinneqarnissaat siunertaasimavoq.

Uppernarsaasersueriaaseq paasiuminartuunermik qulakkeerinneqataasinnaavoq atuisullu toqqassisimanerulernerani kinguneqarsinnaalluni, tassuunakkullu tunisaqarnerulersitsilluni ujaqqanillu tunisassiat akiinik qaffasinnerulersitsilluni. Nassuiaat suliarilluagaarpasippoq sukumiillunilu. Suliarli tamatuma kingorna qanoq nanginneqarsimanersoq ataatsimiititaliamit ersernerlugineqarpoq. Naalakkersuisut siunnersuutip aappassaaneernejarnissaanut akissuteqaammini ajornartorsiut taanna pillugu naatsumik oqaaseqaqqullugit ataatsimiititaliamik qinnuigineqarput.

Ataatsimiititaliap paasinninnera malillugu ujaqqanik atuilluni sanaluttarneq, ujaqqanik erlinnartunik atuilluni pinnerasaasiortarneq mineralinik piiaaneq assigalugu, sammisaasut piffissap ingerlanerani Kalaallit Nunaata aningaasatigut isertitaqarneranut pingaaruteqalertussat.

Nassuiaasiap pineqartup sammisami ujaqqanut pinneraasianut tunngassutilimmi naalackersuinikkut suliniutinik tigussaasunik aallartitsisoqarnissaanik tunngavissiinissaa ataatsimiititaliamit naatsorsuutigineqarluinnarpoq.

Periarfissap taassuma kalaallinut inuiannut iluaqutaalernissaanut akornusiuttut ajornartorsiutillu sunaassusersinissaasa pingaaruteqarnera oqaatigineqarsinnaavoq. Aalajangiiffigisassatut siunnersuutikkut anguniagaq taasissutissakkut tunngavilersuutikkullu erseqqissumik nassuiaatigineqarmat tamatuma allanik oqaaseqarfiginerunissaanut ataatsimiititaliaq tunngavissaqanngilaq, taamaalillunilu inassuteqaamminut ikaarsaassalluni.

### **3. Siunnersuutip aningaasaqarnikkut kingunissai**

Siunnersuutip piviusunngortinneqarnerani aningaasaqarnikkut kingunissaatut missingiutit siunnersuuteqartup aalajangiiffigisassatut siunnersuummi nassuiaatigisimavai. Nassuiaammik suliaqarnerup AC-tut akissarsiaqartup ukiumimi ataatsimi aningaasarsiaasa amerlaqataannik, tassa 500.000 kr.-inik akeqartussatut siunnersuuteqartumit missiliorneqarpoq. Siunnersuuteqartumit nassuiaatigineqartumit allaanerusumik naliliinissaminut ataatsimiititaliaq tunngavissaqanngilaq.


### **4. Ataatsimiititaliap inassuteqaatai**

**Ataatsimiititaliap isumaqatigiittup** siunnersuutip **akuersissutigineqarnissaa** inassutigaa


Ataatsimiititaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappassaaniigassanngortippaa.



Jens Danielsen  
Siulittaasoq



Múte B. Egede  
Siulittaasup tullia




Mala H. Kúko




Henrik Fleischer



Randi V. Evaldsen



Peter Olsen



Tillie Martinussen